

四庫全書

集部

欽定四庫全書

集部

五百家播芳大全文粹卷九十八

詳校官侍郎<sub>臣</sub>劉躍雲

助教<sub>臣</sub>常循履勘

總校官編修<sub>臣</sub>王燕緒

校對官中書<sub>臣</sub>范 鏊

謄錄監生<sub>臣</sub>桑 英

欽定四庫全書

五百家播芳大全文粹卷九十六

宋 魏齊賢

葉 蔡同輯

祭文

名賢 尊官

祭黃尚書文

朱晦翁

大道既隱淳風日敝氣鍾于人鮮克全粹習而益遠輕

肆苟媮言如可重考行則羞猗歟我公受材特異不假脩為嘿與道契端莊靜一終日欽欽不動而敬神保是臨賓于王庭昌言大對庸弗順隨久斥于外晚歸獻納正笏垂紳時而後發一言萬鈞閭閻省曹侃侃禁闥權倖顧之心摧氣奪孝慈柳憐未返北征引經抗疏罷宴請行帝嘉其忠衆服其勇咸惜公行係國輕重公嘗老矣茲復告歸祖帳東門觀者歔歔公在故鄉恂恂翼翼士夫高仰遠邇承式帝曰懷哉舊學之賢乃詢乃訪加

壁以先公拜曰都此帝之德盡言不隱是乃臣職公年  
雖老不杖不扶謂當起復駟馬安車一病踰年竟以喪  
告疏有遺忠當寧震悼嗚呼哀哉某以晚學獲游公門  
望公容貌鄙寬薄敦唯其躁輕弗克持久公不鄙焉撫  
接加厚去歲之春入拜公堂公時已病志氣則強正冠  
肅容不異平日端拱立談教告諄悉豈謂此別遂隔死  
生聞訃欲往竹符是縈寫哀陳詞清綿走酹想像德容  
恍若瞻對顧惟媿情不克其躬永言疇昔以此負公

祭劉樞密文

朱晦翁

在昔歲秋公病欲絕自力為書來告永訣上言國家讎恥未雪冢骨易枯此恨難滅次念遺阡豐碑未揭謂我銘之以永前列下及諸孤羈貫在列謂我教之他靡顧謁字畫方嚴詞氣凜冽是豈死人而有斯說三復悲號心膂貫徹聞公是日三簡并折拜疏千言忠憤是洩我雖不武寔仰竒節生既人英死當鬼傑又惟公家忠孝闕闕紀德銘功盍付時哲公命不亂曷取凡劣諒以孤

生幼罹禍孽蒙被前恩欲報罔竭故畧其愚以累斯碣  
方將涉筆叙次鋪列屬其來西曠日引月迄今乃成事  
偉詞拙遠荐陳之如聽予決想像兩公感涕摧咽顧念  
滯留塵土羈絀莫相嗣人講貫劇切以此負公一飯再  
噎頃為迎師寄此筆舌比聞授受稍契磁鐵尚其不厭  
習久而悅盡歸童心罔蹈非轍彼齊彼孺悉藉提挈卒  
大公門綴此憂悒山瓢往酌野菽并設老淚如傾遠寄  
清血嗚呼哀哉尚享

祭張侍讀文

呂伯恭

昔者某以郡文學事公于嚴陵聲同氣合莫逆無間自是以來一紀之間面講書請區區一得之慮有時自以為過公矣及聞公之論綱舉領挈明白嚴正無繳繞回互激發偏倚之病然後釋然心悅夷然自失邈然始知其不可及此其所以願終身事公而不去者也某天資澁訥交際酬酢心所欲言口或不能發明獨與公合堂同席之際傾倒肝肺無所留藏意所未安詞氣勁切反



類世之彊直者亦不自知其所以然夫豈士為知己盡  
自應爾歟我行天下愛而忘其愚亦有不減公者矣內  
反其心豈敢負之乃獨勇于此而怯于彼抑有由也蓋  
公孳孳求益敦篤懇惻有以發其冥頑勇于改過奮勵  
明決有以起其緩縱而不立已不黨同胸懷坦然無復  
隔閼雖平生退縮固滯之態亦不埒而自除也使我常  
得從公豈無分寸之進使公以愛我之心擴而充之馴  
致予以虛受人之地公天下之身受天下之善行為社

稷生民福孰可限量耶嗚呼公今其死矣亦無所復望  
雖然有一于此公在三之義上通于天養其志承其業  
油油翼翼左右彌縫不以存歿為二者公之事親也念  
大恩之莫報咎誠意之未孚雖身在外心靡不在王室  
鞠躬盡瘁唯力是視不以遠近為間者公之事君也義  
理之大一識所歸永矢靡他至于參觀遍考公學且博  
未嘗如世俗學一先生之言行曖曖昧昧不獲廣求其  
進學之力不以存亡為勤惰者公之事師也公之此心

蓋未嘗死我雖病廢猶有尊足者存亦安知不能追申  
徒而謝子產耶既衰豈能文直寫胸中之誠以告公而  
已申徒事見莊子內篇五申徒嘉兀者也尊足事乃叔  
山無趾並見上

祭郭給事文

黃魯直

惟公德性柔嘉器度優裕遇事從容而有斷臨民寬靜  
而不煩繡衣立朝邦之司直朱輪治郡人有去思早游  
功名之途晚行止足之語揮使金以延父老遺舊德以

食子孫官登左曹考過中數于公所欲可以無悲某等  
登門有年傾蓋若舊銜哀致奠終無所辭嗚呼尚享

祭沈中舍文

王介甫

惟公之生于朝搢紳大夫嬪之以作封君皆以壽終而  
世有人昔我先子公倫之舊施于不肖遂為世友不腆  
之文既藏于丘惟是區區以贊醪羞

祭鄭大著文

黃秦之

嗚呼理固不幸而幸當然而反不然者其顛倒不可

曉未有如公之甚也公之所學顏子之不遷怒不貳過也公之所養孟子之至大至剛以直也公之操履大學之所謂正心誠意儒行之所謂特立獨行也以愛親之心愛君以正己之學正人險夷一節始終一心表裏一致此公之所優為而卓卓乎聖賢之域也僕視公為畏友公亦喜僕之無他故相信愛獨深有善必告也聞過必諫也庠序肄業同也館閣校讎同也僕之塵忝偶先公之一年也公之補郡亦相繼以去國也去冬僕將之

官握手道別無他屬也惟援敬事而信節用而愛人使民以時之語以相勉也僕既泊泊南來且逾半載每得公書寒暄之外則節欲防障而已世俗獎借無一辭及之也嗚呼今之所謂士大夫其有賢于公者耶死于病吾無憾也豈謂一世英俊而死于草木之變耶僕始聞之而未信也意公以直而受謗也中信之而猶疑也意其薄傷而終瘳也既而的且信矣蓋涕泗交下寢食不美者凡不知其幾日夜也嗚呼公竟殞于是也耶此僕

所以求其說而不可得不免舉而歸之不可曉也僕非  
為喪友惜也為天下喪賢士惜也為朝廷喪直臣惜也  
想夫一時搢紳摧氣海內痛心益不獨僕之惜之如此  
之深且切也抑又聞之前輩有為幽明同途之說者謂  
幽明同途之說者謂冥司主斷必求夫世之忠亮正直  
之人而為之吾意公之遽往或者公為是耶公之母老  
而慈弟才而愿婦淑而弱子幼而孤相與求公死之說  
而不可得蓋亦以是求之僕拭淚海濱宦情雲薄一觴

寄酹形與神馳公其皦皦于此者耶尚享

祭薛寺丞文

呂伯恭

余行天下竊有意于斯世其道德純明可為師表者執  
贄進見獲聽微言于下風退而從磊砢不羈之士接杯  
酒之歡嘯歌起舞往往自以為一世之雄至于山巔水  
崖與夫窮閭委巷之間抱負所有與世絕足所可及則  
必一見縱力不能自致而聲音之與通晚得歸休始獲  
見公握手一笑話言從容心痛意愜俯首來東三年之



間竟安此窮人誰不死寧公是逢又殺吾父昊天鞠凶  
生死如此實死與同俯仰皇皇未知所終

祭曾侍郎文

代通判

嗚呼念昔逮事正始諸賢歲凋月零茫茫逝川如將旦  
星如欲絕絃天奪我公遂空英躔清節絕學名章大篇  
吾道之遺續以九原貌是哀宗舊惟有連施及孤生再  
獎再憐訃車之來亦既踰年誰謂越遠病不能前淚落  
奠觴迹後必先

祭芮祭酒文

耒耜掛壁耒識菑畲饑者見之喜動眉鬚寔之感人如  
鼓應桴見諸功用則皆其餘通都大達訃車相及匪戚  
匪姻越肥秦瘠聞公之死交弔聚泣公微權勢人裁戶  
培彼拳拳者果何為哉升屋三號萬事冰泮誰繫維之  
至此不畔矧惟某等事公澤宮臨風一慟吾道其窮前  
日之祖今日之酹牲酒未酸俛仰千載

祭唐立夫待制文

張敬夫

惟公清夷粹溫抗志千古文詞深嚴穆我王度獻納雍  
容有感無忤遇民如子伊教匪怒及臨事曾不改平素  
人方忽忽已獨有裕嗚呼惟公之賢世或知之而鮮克  
窺其微蓋據梧隱几獨得忘言之妙故飢食渴飲俱不  
外乎天機存沒無懼化則亦宜先君與公道義之交豈  
獨賓客之敬藐然孤生早辰過聽推其所懷于公莫隱  
方抱鉅痛公復云亡東望鄙然有涕淋浪免喪之初念  
篤先友敬遣蕪詞侑此卮酒

祭王詹事文

張欽夫

惟公天與勁持世推忠純正色立朝奸邪所憚其于當  
今大義胸中見之甚明非苟然假竊者比也蓋自發策  
大庭至于沒齒凡十五年凜如一日去年之春復來造  
朝身雖已病愛君彌篤惟昔先人雅器重公藐然孤生  
晚蒙公知去違朝路曾不幾日遽聞來訃越在道途迄  
今定止始克遣一觴之奠蓋為茲世痛公之亡而非獨  
下交之私情也尚享

祭張安國舍人文

嗚呼如君而止斯耶其英邁豪特之氣其復可得耶其如長江大河奔逸洶湧渺然無際而獨不見其東滙溟渤之時耶又如驂騑騷耳追風絕塵一日千里而獨不見其日暮稅駕之所耶此某所以痛之深惜之至而哭之悲也惟君布衣被簡遇者十年之間入司帝命出領數路文章之煒煜政事之超卓多士之所共知亦不待某之贊嘆唯其孝友恂恂朝夕則恪人有不得而盡知

者方自荊州歸某以書抵君謂及此閒暇專意承志寔  
進德脩業之要君深以為然孰謂曾未數月乃有此聞  
某傾蓋荷知久而彌篤言有勁切君不以為迂此意何  
可忘也道阻且長不能往哭遣致一奠孰知予悲嗚呼  
尚饗

祭張安國舍人文

惟年月日具位某率某官就某城北祓禊亭為位敢致  
祭于亡友宮使顯學舍人張公之靈嗚呼去年此時送

公湘濱豈期今茲哭公失聲英爽在目交情不忘邈不復見我涕以滂惟公天資邁偉發越而不壽考以昌王國今茲之哭豈吾黨私醴殽非多公其臨之

祭王侍郎文

惟靈強毅自立克大其門進登王朝無所附麗從容造膝有見不隱帝稱其直士歎其忠豈期卧家遽以訃告凡百君子孰不嗟痛矧惟交舊嘗辱論心為國惜賢揮淚無已道阻且長莫獲走前一奠不腆少致此誠嗚呼

哀哉尚享

祭侍郎呂公文

張敬夫

嗚呼前歲之春識公嚴陵望其容有藹然慈祥豈弟之  
氣知其臨民之不苛也聽其言纔然多故家遺俗之事  
又知其世守之不忘也別後之書情何篤也訃音之傳  
痛何遽也況于令子友義為深一奠之禮敢以薄而廢  
耶尚享

祭賈檢正文



惟公植德敦靜蓋徐公之有常秉心曠夷寔師德之無  
競奉職外服去愈見思列官王朝久不改度方矚持荷  
之拜遽遭偃月之疑猶易護藩豈期易簣某夙蒙睠予  
託在葭莩祇增百感之深莫切一酌之慟禮雖不腆情  
則可知尚享

祭張左丞文

王介甫

公作昇州先君寔佐公為其子請昏于我先君不幸公  
觀京師訃逮公門公哭殊悲弔問賻祭使來以時乃今

公薨獨以宴故財無以禴祭又不時獨悲以慕惟公之  
生明惠裕和善恕于人恩寔我多雖祭不時其吐之耶  
尚享

祭刁景純學士文

嗚呼刁公不忤不求坦然立行之平裕然與人之周既  
貴賤以同觀不始終之相侔惟其動必依于仁故其壽  
若此之脩望音容而已遠欲親弔以無由旣臨風而出  
涕辭以侑乎醪羞

祭張安國檢正文

嗚乎善之不可福其已久矣豈今于君始悼歎其如此  
自君喪除知必顧己怪久不至豈其病歟今也君弟哭  
而來訃天下姑釋一士以為己助何生之艱而死之遽  
君始從我與吾兒遊言動視聽正而不偷樂于飢寒惟  
道之謀既掾司法議事讞失中書大理再為君屈遂升  
宰屬能撓彊屈辨正獄訟又嘗精出豈君刑名為獨窮  
深直諒明清靡所不任入井莫知乃惻我心君仁至矣

勇施而忘己君孝至矣孺慕而至死能人所難可謂君子嗚呼吾兒逝矣君又隨之我留在世其與幾時酒食之哀侑以言詞尚享

祭宋龍圖文

趙承之

逝川何往尚餘不慙之悲新穀再升俄及既除之薦悵音容之莫見紛涕淚以無從眷此三川之氓素蒙五袴之惠經過峴首忍看叔子之碑悵望桐鄉爭哭仲卿之墓矧惟晚進獲嗣前塵迹眴眴以有初荷顧存之甚渥高

山景行敢悲舊尹之規摹升酒隻雞具致邦人之慘愴  
禮則陋矣公其吐諸尚享

祭莫彥濟學士文

葛謙白

嗚呼枯梅三百聊當傾三峽之辨金釵十二不假醉錦  
瑟之賓濯月溪之清泚恐洒塵之汙人勇掛冠于神武  
及強士之青春悟歲華之電掣凜風雨而鷄晨數雖登  
于大耋官僅綴于朝紳忽蛻骨而仙去賢竟厄于己辰  
嗚呼哀哉惟操脩之內美攬蘭茝以自紉見古人于黃

卷擁佔畢而微呻忽棄置于糟粕思獨味于玄津既資  
深而逢原遂奔逸而絕塵尚復牽于氣習猶吐故而納  
新鍊華池漱液滄丹田以成真戲五禽于衽席養不死  
之谷神謂當出綠髓而三洗齊壽量于莊椿豈期遽窘  
不杯之土而岌蒼石之麒麟也嗚呼哀哉惟我公之先  
世通曾門之外姻公棟宇于雲水我田園于江濱情雖  
篤于中外地若隔于胡秦欲見公而不可結肝腑于輪  
囷泊歲逢于作噩動妖祲于蒼旻紛虵豕之踐蹂嗚呼

蹕以東巡乃攜孥而避地因卜築以依仁望門墻而咫尺航一葦于大淵淪破雲程而放溜舞清風于白蘋每登門而侍坐辱訓藥之諄諄別音徽之幾何驚駛景之義輪忽訃音之在耳愴心膂以酸辛歎總帷以一慟落老淚以霑巾雖伯道之無兒知德音之不泯有令孫之踊蹕與九死之為鄰始墨面而重妍走群山之嶙峋詢眠牛之吉兆得佳城于荆榛意公後之必大蔚曾玄之誥誥公何憾于即世其永安于窀穸會靈輜之啟公謁

愁霧于松筠病莫諧于執紼恐哀情之莫伸致肴蒸而  
蘭藉輟桂酒之清醇聊作文以侑奠效楚語于靈均嗚  
呼尚享

祭沈孟明兵曹文

嗚呼孟明白璧無瑕席上珍兮天球不琢樸以直疊疊  
兮黃卷味文津兮發而為文錦繡新兮收科若捨先秀  
民兮三官連茹萃一身兮謂當騰趯起渭莘兮如何弗  
弔厄已辰兮胷中之竒百不伸兮嗚呼哀哉惟歲作噩



始依仁兮酹酒豆迭賓主兮東阡北陌踏芳塵兮握手笑聚亡夕晨兮金溪十年又卜隣兮肯紆華閣合晉秦兮既婚且友情益親兮公方病瘵殞天倫兮人言公有疾日臻兮竟坐傷蠱殲若人兮嗚呼哀哉妙喜之原宋木春兮將啟泉臺岌石麟兮

祭侍郎鄒公文

陳了翁

嗚呼公之處世五十二年以身殉國老而彌堅公議所與孰如公言歎公之歿誰則不然公之孝友鄉黨所師

移以事君無毫髮欺國是所棄天子所知胡不少挺捨  
我聖時如公德業可遠可久夷險皆行過涉無咎俯仰  
不忤推殞何疚死而不忘孰曰非壽公切志道如坎之  
流弗舍晝夜至海而休生也有涯數盡莫留壽夭不貳  
亦又何求身如虛船觸礙而止動而隨行時則可矣載  
沉載浮虛也足恃翼或維之終不獲試方其疾革粥藥  
並廢十日不食清坐飲水未報君親齋志長逝臨絕之  
言恨此而已神賚之丹不與之年窮達脩短孰能違天

我病且老自作苦緣公乃何為棄我而先人亦有言既  
明且哲我危其身駟不及舌吾語在世身何必留屏迹  
待盡將與公遊尚享

祭莫大卿文

汪彥章

嗚呼惟大觀之初元始識公于班序望眉宇之粹然知  
德人之可慕奉談宴以周旋紛數遭而莫數辱投分以  
日深人孰如于我故逮抵命以剖符辱苔溪之佳處偶  
通德之里門憩康成之杖屨豈綿薄之克勝得吏師之

祗懼間簿領之沉迷輒相從于樽俎訖歲時之主移免  
鄧侯之催去既阻闊于山川猶書郵之旁午申松柏之  
後凋每勤勤于縞紵歲月以來冬即名山之暫寓間宿  
疾之復侵翼即寬而調護恨城闕之相望莫見公而勞  
苦蒙手字之欵傾訣終天于朝暮曾閱日之幾何忽傳  
聞于音訃偉夫子之好脩極精明而本恕鄙奏讞之深  
文家傳書于小杜流愷悌于三州寄哀矜于兩部雖毒  
社之已多人方期于衛武胡遽奪于老成哀鄉評之誰

主矧千日之服膺將典型之安取寫哀涕于一觴隔語  
言于千古嗚呼尚享

祭盧諫議文

惟公奮于南服以學法身篤信所得務為貴珍始事學  
省亨途可循力請補外心無屈伸天子嗣服敷求正人  
有以告公當膺選掄遂應名節來朝帝宸初副臺屬旋  
升諫臣當宁傾待有疑必詢公亦展盡屢撓逆鱗坐使  
初政朝綱一新衆謂朝夕登公要津孰云小泰隨以大

屯如木合抱摧之半辰訃牘來上天顏色嘖褒贈絕等  
從中出綸惟數脩短誰逃大鈞公獨非命天乎不仁旅  
櫬千里旁無族姻銘旌所過見者酸辛矧我同省餘光  
辛親川塗契濶笑語未頻茲焉已矣揮淚滿巾有酒既  
酌有肴既陳公來一訣永反其真嗚呼尚享

祭崔正文文

晁說之

凡形質枯槁而文章英華言恐忤物而憤惡嫉邪仕而  
屢跌曾不慘嗟遠官沅湘樂詩書于烟霞身雖老子猷

畝志每存乎邦家自視苦無能而畏人識者譽聞以豪  
誇遠而求之黃叔度元魯山之流在本朝則王子野江  
鄰幾之類耶庶幾古人之可見而我宋人物之盛耶嗚  
呼逸于晦蒙身偶蒿蓬上皇有命執憲殿中匹馬入門  
遽不得容天子夢寐賢哲召補諫列兄曰時哉檻不用  
折曜然榻前言則業業衆人危之天子欣納是纔一對  
病卧累月却藥餌而稀罕奏章疏以稠疊孰不有言恐  
莫如兄枕首仰筆裂紙以書語弱雖聞茲勇有餘豈不

懷歸山下敝廬乞退未遂掛冠弗俞諫臣徬徨聯名上  
章斯言宜留病不可強使其綿綴俟死周行幸蒙恩賜  
覲生故鄉天子曰咨古之淳樸以疾歸聞寵之龍閣示  
予貪賢待爾弗藥何帝命以再生宜巫咸之不作嗚呼  
天乎理或溟漠俱驚朝露寧論夜壑說之少兄二歲以  
兄事之名同書于邪籍情每見于危詩今也兄先我以  
逝顧我先之能幾將乞歸于箕穎手新松以盡悲當高  
秋而百感揮苦淚于一詞



祭崔正言文

余坦

先生為行之難如山峯巖竦天巔屹雖世無目尚能仰  
觀為詩之清如水雪冰塵清瑩明雖世昏濁亦能悟醒  
嗚呼此特過棄萬分之餘屈而不用見于窮居固已舉  
世特立亭亭孤鶴高視古人揖之為徒豈持爭衡兒輩  
坐雄萬夫者也猶有論議隱隱砭疾雷震霆戰骨驚  
誠邪醢佞擒奸人朋黨利于莫邪堅于甲兵獨我輩人  
飽于聽聞恨未一試敷之公紘晚被召用置在諫闥公

策病起勇不可遏平生之懷有待一發堂堂三疏皦若  
日月百年姦魁奴視唾喝凶芽逆焰力捍手拔雖百未  
一展而海內響動萬姓匄匄邪情崩阻魂喪氣奪天胡  
不假遽爾中奪大川將濟楫維何折嗚呼哀哉雖非不  
壽猶未七十何前日不死而今死也嗚呼天乎其有意  
乎其不為公惜乎其不為蒼生惜乎予愚無知不足以  
知之凡我親舊痛公無後愴公田園無所畀付雖出于  
恩義故惜與平生所嘆慕要是以小人之腹量君子之

慮死者泯泯多寡何數萬世之下當有知音有識之士  
式公之門表公之墓奚荒園一頃壞穴數畝禁採樵却  
狐兔之足語也顧予何人愚鈍莫比天下知音一人而  
已公自長年來婿吾姊我時垂髫猶未毀齒聞其誦書  
知非凡子嘗謂予曰嘻此千章木但毫末耳竢之歲年  
必自雲起至于成童伴公夜語試我文章屬以詩句公  
舉燈螢我偶花蝶公大驚嘆此語勝我子當以文于世  
濶步奚必區區等事科舉自此吾文必以似公公之賞

可必有次第采章摘句必當人意我既冠年出游太學  
或者讒予是兒美質覲有成立使之游學恐遂放恣公  
笑曰是郎豈人所能壞者也我既登第已婚元氏或又  
讒予是子入仕必私于元將倚若人以覓舉主公又笑  
曰吾九郎當有識者豈肯因人求舉哉況所懷負固自  
不同也嗚呼此二事皆夙昔對吾母言者也我痛念公  
我知母存焉豈持渭陽康公與一知己管仲鮑叔子產  
叔皮之比也嗚呼我聞公疾方妻告病不能往視間遇

公喪吾妻適死不能慟哭患難相遭筋力無禮負愧已  
餘徒有泣淚淚下如繩而不止也公名諫官我亦御史  
拉我同行庶幾同心念其貧困貸之白金我不敢承歸  
公衛女蓋不敢自愧于幽明者也幸坦今病少間遣哀  
一誄以陳平生言之不文亦或見情嗚呼尚享

祭崔正言文

賈公哲

嗚呼德符汝穎奇卿士之先達苦節平生無遺毫髮介  
介自守與世契濶欣然言笑于所投合我來鄉居公踰

五十行成名立冰玉剛潔我近四十髮俱未白老壯相從情敦意洽予始見之相得眉睫邂逅開談一語三日間捨而去游宦遠涉及歸如初期我岩穴昨見邑中暮春之末過我園林相共飲食我迫選限次日先發公後旬朔召補餘闕相見京師公居言責賓客延門冠佩奕奕豈不思公從容平昔慨念眉宇久不獲揖入對天子昆弟往謁謂予不求乃畢此月遂解衣冠坐其懸榻語欲更僕日既西夕山城幽居自放泉石去吏十年解縱

羈繫墨繳累形百骸未伏僕悍鞭長羣馬取捷天街九  
達夏日赫烈熱風囂塵罹此瘴暍伏忱惓惓吁歎姦孽  
迨五十日病以增劇二諫大夫助之諗疾天子曰噫舉  
茲朝列孰如老成剛腸勁節方欲倚之言動闕失詞于  
琳宮職于延閣畀以優閒庶其勿藥束裝戒僕疾且向  
革告命臨門是夕殞歿張范擇友愧以死託懼有不知  
謂余周悉彼有餘鑑此有行囊無以費余聊厚非薄明  
明茲言理無擠壑歷問他事一不肯屑平生所欲學日

製作人隨取去無復留篋故所上事世務指切并近  
奏牘則皆不失愒愒在床以待晷刻熟視久之無可言  
說中心了然迨至易簀奚為怛化安眠委蛻棺具既堅  
爰用紵漆朝衣入卧餘從不設兩街凶肆取募強猾脅  
力是圖旅櫬自挈都門之道坦無阻垵水潦未降無泥  
可汨涕泗長郊不及引紵余待朝辭後乃至邑南園北  
第方為痛哭弔公佳倩女久出適來自秦中腰其父經  
夫婦銜恤祠公故室喪從先祖考用家法出財覲僧精



意齊七爰卜三浮穿土百尺瑩冢是封植之剛柏嗟余  
之幸偷墮是獲指力不施友責大寒晏晏高原歸安公  
宅人世是非無勞黑白妙理所盡有如莊易嘗謂公言  
有如默識四禪中人形幹枯腊世味泊然少所愛着公  
乃其徒早自悟入溷濁世間那復遺迹悠悠斯心無足  
忿嫉情識顛倒難可致詰羊曇慟哭叩門以策睠彼丘  
山悼茲華屋兩墮王命今茲歸骨侑觴以詞聊助推咽  
尚享

祭陸左丞文

趙承之

江海之英會稽之靈山水秀發瑰奇挺生氣變物遷竹  
箭不植天儲其精以賦有德公寔鍾之粹然以文如玉  
之璞如金之渾士衡云亡贅也不作中數百年系牒哀  
落自公之生載振厥聲發迹南服揚名上京奏篇如雲  
取第若拾諸公逡巡多士拱立熙寧元豐天子聖明掄  
選俊人作新度程公登于朝惟帝所偉密勿周行雍容  
近侍方駕駟馬順風疾馳帝升白雲公亦退飛聖皇龍

興俄以詔起丞于文昌喟其晚矣無幾何時而以病歸  
尚曰有瘳忽然其妻嗚呼哀哉某叨彼守符辱臨公里  
公歸九原士夫落淚簡書之畏莫助公喪恭遣僚屬奠  
茲一觴尚享

五百家播芳大全文粹卷九十六

欽定四庫全書

五百家播芳大全文粹卷九十七

闕

宋 魏齊賢

葉 茶同輯

祭文

名賢 尊官

祭馬處厚文

祭路持正文

祭王正孺文

祭徐德占文

祭范叔才郎中文

祭周進叔文

祭張都曹文

祭馬玘大夫文

祭姚大夫文

祭王中奉文

祭王天經承議文

祭王承議文

祭畢朝請文

祭李承議文

祭商通直文

祭唐大夫文

祭楊大夫文

祭俞武節文

祭魏國錄文

祭魏國錄文

祭潘朝請文

祭虞雍公文

祭秦致政文

祭邢致政文

祭黃運使文

祭趙養民運使文



祭蕭運使文

祭燕純甫運使文

祭陳誠老運使文

五百家播芳大全文粹卷九十七

欽定四庫全書

五百家播芳大全文粹卷九十八

闕

宋 魏齊賢

葉 榮同輯

祭文

監司 州縣官

祭李提刑文

祭吳提刑文



路祭李提刑文

祭萬提刑文

祭王補之安撫文

祭劉安撫文

祭甄摠管文

祭劉參議文

祭宋參議文

祭宇文太守文

祭宇文太守文

祭泰定州文

祭杜慶州文

祭黨太守文

祭李仲良長官文

祭章道祖通判文

祭李仲益通判文

祭方簽判文

祭儲經蜀文

祭陸教授文

祭賈知縣文

祭荷知縣文

祭胡主簿文

五百家播芳大全文粹卷九十八

欽定四庫全書

集部

五百家播芳大全文粹卷

九十九  
一百

詳校官侍郎<sub>臣</sub>劉躍雲

助教<sub>臣</sub>常循覆勘

總校官編修<sub>臣</sub>王燕緒

校對官中書<sub>臣</sub>范 鑒

謄錄監生<sub>臣</sub>周 相

欽定四庫全書

五百家播芳大全文粹卷九十九

宋 魏齊賢

葉 榮同輯

祭文

焚黃

焚黃祭考君文

趙德莊

維乾道八年歲次壬辰九月丁卯朔二十九日乙未男



具位某謹以清酌庶羞之奠敢昭告于先考中奉之靈  
天下之願欲有富貴者不能致而孤窮之人或得之世  
稱仕宦曰去墳墓而古人所記以過家上冢為榮今者  
某以刺史章守松楸者二年而疊蒙上恩寵加其先得  
以綸告親奉于神明誠富貴者未必有而孤兒之幸一  
時所慕焉者也舛然之政粗寡怨尤樵牧之虞可以不  
戒惟是音容益遠掃祭無期哀涕颺然肝腸俱裂嗚呼  
尚享

焚黃祭妣親文

維乾道三年歲次丁亥十二月甲午朔初五日戊戌男  
具位某謹以清酌庶羞之奠敢昭告于先妣恭人之靈  
夫以本朝以孝治天下士有列于朝者慶賜之行必及  
其親某數年之間蒙上嘉寵進大夫之號凡三等而今  
者靈宮朝成綸誥夕至事若合契榮逾過蒙天子休命  
不敢留夫人餘善不可掩敬用齋被告諸神明其慶其  
承以佑我後尚享

焚黃祭文

黃泰之

我幼失怙冠而喪母年甫五十遽哭仲子以我哭子知親之仁我則不孝胡然報親親恩無窮子報有限今之需被曾未尺寸孤窮憂戚進德之階庶後厥榮親其鑒哉

焚黃祭文

某以不才繆塵仕版閭閻之助繫靈寶多乃位于朝式經郊需追榮之典國有故常盡所以慰人臣追遠念舊

之心且俾夫淑德令婦生雖不食邑而後亦不失身後之名也魂兮如在服此寵光乎

焚黃祭考妣文

汪彥章

嗚呼某不獲罪于天不獲終考妣之養又不能躬守墳墓奉祠春秋日往月來于心哀慕有不勝言者幸銜訓嗣事叨榮于朝每朝廷恩數之頒必推本所自進官遷秩追賁泉扃故自某去松櫨十八年間被命書者無慮十數謹擇剛日告於墓前惟我考妣惠顧不忘服天子

寵休以垂裕于後

焚黃祭考妣文

孫仲益

某早承先訓束髮授書兩踐詞科濫升冊府四備省  
臺之列五歷儒學之官浸冒朝榮遂登詞禁躋延華  
閣出守便藩惟聖主推曠蕩之恩追本教忠之自而  
人子致哀榮之極肆疏飾壤之封超躡崇階進都顯  
號先考承事凡七封而至朝議先妣太孺更三賜而  
至今人玳首鸞橈朱衣象板丕顯三朝之命光賁九

泉之幽乎

焚黃祭文

代

陳無已

故事天子祀享天地同休諸臣施及存歿某年以散郎  
竊位于朝與有追榮之典自衛尉少卿卿中大夫三告  
于第其所以褒郭氏之意甚寵既藏于家又焚其副書  
以追錫于地下則天子孝治之道亦已至矣顧惟不似  
何以及此惟是先大夫之餘休遺澤積厚流光故能生  
享其祿歿受其報則天之報施善人不為不至也故敢

以告

考妣

先考獨善先生祠堂祭文

熊子復

某猥蒙先慶方校石渠之文薦誤上恩更紬金匱之史  
蓋有典謨篇則章堯舜之聖然惜春秋詞則非游夏之  
能修書屬纂于四朝秉筆詎庸于一介幸斯文之亦預  
皆吾父之所貽知幾載國史之言敢含毫而弗決子長  
述先人之事雖流涕以何從感茲霜露用薦神明其慶

其承以佑我後尚享

先考奉議祠堂祭文

典冊府之秘藏纔叨序轉攝辭闡之遽直遽冒簡  
除維此誤于上恩蓋寶緣于先慶懷錦溪風月之  
藏徒夢繞于祠堂寓鑒坡雲霧之窓阻躬陳于薦  
豆

堂祭壽光縣君文

汪彥章

某等得罪神明傾奪茲陰甄然孤露駒犢不如日



月有期禮當即遠扳號莫及糜潰肺肝恨不滅生  
以死為殉忍羞甘旨如奉晨昏瀝血呼天冤訴何  
所

遷葬祖母祭文

趙德莊

嗚呼盛衰之理其不可常哉其可悲也哉某嘗忍言之  
方我太夫人之康寧也慈祥之化熙怡恬愉子孫同年  
擢第而歸男書女絲內外盈室旨甘滌瀝抱其曾孫時  
節出遊扳輿爭持升堂上壽賜觴累十自憶平生每常

如此曾不知其樂也及其衰也太夫人不待耄而卒父  
僅免喪費志以歿少者壯者相繼淪亡十年之間零落  
殆盡于是生有不能養而死有不得葬者矣尚其幸者  
太夫人親享其盛之樂而不知其衰之悲也邈焉佛廬  
非神所安祭拜掃除不具而缺歲時霜露肺肝如焚蓋  
又十年而後某遭時簡拔稍建門戶諸孫宦學粗有成  
立乃克襄大事于今茲山川清華有桂有松靈車孔安  
姻族畢至而某蒙上哀眷實持使者之節以來行路咨

嗟且吊且慶庶幾乎曩者之盛矣神靈在上喜耶悲耶  
顧我諸孤弗復思耶冥冥終古逝若斯耶嗚呼哀哉尚  
享

遷葬母祭文

嗚呼諸孤不孝早失母慈時方亂餘父仕不偶江城藁  
葬旋踵去之兒雖稚童寧不知痛日夜望父壽考顯榮  
十有三年薦罹大故父素清峻兒官又畀弟呼妹號墮  
彼閩嶠葬雖兒事力惟他人西望母喪不敢言拊飲此

沉恨天地有窮惟禍之延譬彼烈火死威莫救生窮無  
歸凜凜十年神怒始怠嫁娶官學稍為生人兒宰是邦  
與民相樂退而可老乃營母宮逮茲告遷兒亦白首獲  
申自力始終服勞諸孤四方不能咸集兒獨最幸蒙上  
哀憐載以輶車歸為母寵親郊之慶父升卿班母貴如  
之綸誥鼎至積善之報匪我後人惟兒兄弟視母如在  
或仕或處實為一家護持松楸罔敢怠失母也安止  
寧知兒孤嗚呼哀哉尚饗

省墓祭文

張敬夫

某往者惟念古不墓祭之義每來展省號哭于前不敢  
用世俗之禮以行其所不安而其中心終有所未滿者  
近讀周禮有祭于墓為尸之文乃始悚然深維先王之  
意存世俗之禮所以緣人情之不忍而立尸以享所以  
明鬼神之義蓋其處之者精矣今茲用是敬體此義為  
位于亭具酒肴之薦以寫其追慕之誠惟事之始不敢  
不告俯伏流涕不知所云考妣之神實鑒臨之

家廟祭文

不患莫知可惟求于自己必有餘慶善益積于吾家伏  
念某五上絕忝于儒科再轉猥塵于師職竭來潤浦統  
在浙畿既踰兩考之書遂獲六章之薦固上官之垂憫  
實先世之蒙休然而歲則尤賒事亦多變惟益圖于  
黽勉更默藉于護持俾及代期不虧員數庶脫選坑之  
冗亦階仕路之榮

祭遠祖顯靈英濟王文

嗚呼隋失厥馭中原沸騰擾攘名字羣雄競稱王起問  
里幾同販繒有地千里一方所憑聞真主出矍如履冰  
遽籍疆土輔唐以興屢錫褒詔人知勸懲既歿牖下咸  
思奉承廟食故壤左淵右陵歷記五百若王始覺逮入  
吾宋神光愈明請雨請霽信而有徵乃進王爵彝章並  
升燕及後裔日蕃歲增散處諸邑非雲則仍間顯于世  
如膏續燈小子何幸守符是膺身則寵矣懼材弗勝日  
賴陰相宜其股肱欲走祠下拘攣莫能爰薦菲薄實

之豆登用告來者毋忘禴烝尚饗

祭先考祠堂文

嚴仲仁

士孰不知學學而儒雅足以飾吏乃士之賢吏若不為  
政政而剛明足以去惡乃吏之先茲二者難乎一舉而  
兩得得之矣又孰見其雖老而彌堅惟公醉飽六經網  
羅百氏胸中之所停蓄浩乎江海之巨浸文焰之所暴  
耀爛如日月之高懸若其偉望推美乎當代懿行躡蹤  
乎古人庠校願得以為友奮乎百世之下克追孔孟之



與淵騫奈何徒資之以如此之德且賦之以如此之才而不使折桂林之一枝搏鵬程之九萬里為此者蓋乎莫致之命莫為之天而士猶足以行其志功猶足以及其民祿猶足以調其親而令聞廣譽遂以卓茂魯恭並流無窮者乃公平昔所蘊之萬一獨有為于耆艾之年至于厭簪紱之儻來樂溪山之勝賞養恬少室放意松滋一觴一詠歡無虛日人皆謂公為山中宰相閨苑神仙善既積于厥躬壽雖富而合延奄玉樓之落成亟鶴

馭之言旋雖芳蘭乍凋一時以為恨而高風不泯萬古  
猶以傳愴哀思之罔極念欲報以茫然爰卜吉于崇岡  
庶安止于新阡清飈吹林素月滿川溪光起而相蕩煙  
色散而爭妍公生則愛此今死寧舍旃靈車在途總帳  
云遷望佳辰而永訣空隕涕而漣漣聊寓辭于一奠公  
來歆其吉蠲嗚呼哀哉伏惟尚享

過房子祭所生母文

淵生珠齊矜其明燦燦乎令淵之靈崑生玉趙貴其珍

溫溫乎全崑之神嗚呼丹山之鳳棲乎高梧寤寐丹山  
莫涯歸歟陽穴之駒鳴于通衢瞻戀陽穴徒切依於嗚  
呼日月並明宿靄掩翳蟾兔失精岵岵長陟烈火震蕩  
草木落魄嗚呼卧冰舞絳心已有歸輟社護雷志曷忍違  
內親

祭叔父給事文

黃魯直

嗚呼叔父忠信足以感欺匿和裕足以諧怨爭行不祈  
報之施為不近名之清孝弟達于草木勤勞載于朝廷

謂當朝夕三事光輝九族白首庇民百僚是式黃扉青  
瑣曾不期月如何昊天殲奪斯極嗚呼哀哉在昔叔父  
典獄宣城牧民會昌恐一不情視之如傷司農討論御  
史補察持節賑饑鰥寡受職六年在晉民可即戎教之  
信義不奪農功元祐考績民兵蠹政監觀四方維晉不  
病使者奪印以謝逋逃維叔父留中郎民曹是將使節  
并護隴蜀食茶乘馬夷夏與足入佐兗司與聞和羹起  
居柱下日近清明人謂叔父宜在帝側山龍黼黻潤色

袞職二聖材之俾承密旨有冤楚獄無根受詆叔父拜  
章極謝固功亦憂兵食遂到闕中日月照臨白珪無考  
來給事中方將耄老陰德在民民功在邦善士彈冠豈  
惟我宗嗚呼何負于神祇忽遽隕傾越在衰削聞訃顛  
踣荼蓼薰心無淚續哭今我不天又失叔父彼蒼者何  
忍此窮露兄弟之子猶子然有是言叔父拊我我乃信  
然平生拜至教誨笑色今哭歸船斷旌枯木几筵在堂  
不聞金玉之音酌酒不觴落涕隕心嗚呼哀哉

祭十叔父朝請文

熊子復

昔我先君與十叔父未冠而孤家四壁立高平夫人黑髮滿櫛攜持東歸一錢之奉必自己出先君與叔父躬苦服勞晝耕夜讀陋巷簞食人不堪憂啜粟飲水歡盡其孝辛勤十年用立門戶高堂致養祿則逮親錫爵九卿燕及皇祖子孫秩秩遂為大家兄弟白首舉酒相對夫豈不懷昔困人遂百韻之詩以莒為戒時我諸子實預聞之紹聖無祿先君即世我與二三孤悼心失圖引

領瞻然望曰惟祖惟父其誰恤予躬叔父千里啟書泣  
數行下車不及載匍匐來歸俾我先君獲從先大夫以  
安於九泉非叔父之力其誰克尸之我是用命鉤膺鏤錫  
不敢失墜冀或未死其猶報厚嗚呼孰謂叔父棄我而  
先逝乎昔叔父之既告老也我猶庶幾曰終更亟歸以  
歲為期魚烹酌酒鞠踞奉鞫起前致詞上千萬歲我見  
叔父先君存焉天不悔禍家難重仍仲姑季母如葉隕  
霜惟獨叔父今也則亡生不承顏病不嘗藥拊觀誰慟

屬纊誰託虧恩負義生慙死忤嗚呼哀哉福清之慈足  
以撫後嗣太廟之孝足以紹先烈惟我叔父其何憾焉  
惟是平生不耀有德孝弟忠信實秉金石人或弗識昧  
莫覺知是惟子弟之責我不得而敢辭願與諸兄仲叔  
季弟收拾懿美緝比行事將考遠日附之寔窆以燕叔  
父之歸則欲報罔極雖不萬一而下見先君庶無愧于  
異時也長河洋洋莫不親酌匪酒則多續以涕淚嗚呼  
哀哉尚享



祭族叔承議文

汪彥章

嗟惟我公全德自名酬酢萬事一專以誠魏有東郭唐  
有魯山千載相望與公為三世人雄夸藻藉琮璧外雖  
粲然中滿瑕謫公獨樸茂不為琢雕經書自奮通班漢  
朝世人紛爭步設二羿術窮數殫還復相勝公獨淳至  
不為巧巖內蒞劇邑豺狼化之文為人師行為人則凡  
人所趨無一能惑坐禦浮薄如堤捍川天胡不留使至  
百年公于死生視若泡影伊人則憂風俗誰正吾宗之

幸家有德人况蒙公知愛與子均聞公永歸不克馳送  
以詞寫哀非公誰慟嗚呼哀哉尚饗

祭南康太守四九兄文

張敬夫

嗚呼同祖兄弟今存四人惟兄能文自于妙齡意期遠  
大以翼吾門僅守一州才未克伸豈謂茲朝乃傳訃音  
驚惶慟哭痛心原鵠為位一奠哀哉此情嗚呼哀哉尚  
享

祭南康太守四九兄文

嗚呼哀哉惟兄早歲秀發而文秦國諸恩篤于諸孫忠  
獻之愛視子攸均矧惟伯父實艱實廩未究之業付之  
吾兄謂當遠大以翼以承如何中道車折其輪僅歷一  
州莫覩厥成嗚呼哀哉某之于兄少長于親論文講藝  
豈無友生雪川之別慘焉酸辛視兄之容澁而不榮酒  
酣諄復願言愛身少屏剛劑以致和平孰期一疾竟以  
此傾嗚呼哀哉于今幾年遠寓雪濱鴻雁莫聯每傷于  
心矧茲永訣痛復可任念當挈歸以近榆枌乃聞治命

旅塋是云嗚呼哀哉遺字見屬奉之涕零將絕泚筆又  
何剛明嗚呼哀哉屬拘印紱奔走不能向風長號薄奠  
是陳猶子幼弱念言惇惇敢不扶持兄言是尊尚惟英  
爽其或來歆嗚呼哀哉尚享

祭經幹八兄文

嗟乎吾兄生也多屯惟生之艱難宜永厥齡胡亦嗇之  
而止于斯命也不齊其孰為之乙酉之夏過我湘濱撫  
我苦塊話言諄諄為我久留久則不忍舟中話別有淚

如隕我觀吾兄齒髮未衰願言愛日相逢有時兄復一  
笑子言甚真我健且武當復南征側聞還家有以自娛  
灑酒擊鮮賓言則都謂當婆娑畢此晚歲豈期計來駭  
痛曷已邈在萬里走哭無從寄此一觴酌洒南風嗚呼  
哀哉尚享

祭奉議兄文

陳了翁

維宣和元年歲次己亥七月壬申朔初三日甲戌宣教  
賜緋魚袋陳某敬遣人以剛鬣柔毛清酌庶羞之

奠致祭于亡兄奉議之靈嗚呼束髮以仕七十而歸既  
垂其車心閒無為居有室廬游有園池花疏水竹取意  
設施阡陌臺榭鄉黨交隨笑語繾綣酒肴燕嬉耳聰聰  
利視分毫釐齒截大肉足能安馳他人高年或壯或羸  
耄耄悼獨健世罕有之去年九月書來江湄字畫遒勁未  
減昔時語不諄復百無可疑喜茲康寧念不及醫云何  
奄忽不到期頤嗚呼哀哉死生隔矣欲往撫棺迹繫異  
里凡為旅者歲久必歸獨未得也云胡不悲昔竄合浦

還而復流江湖淮海十有八秋罪大薄謫恩隆命微升  
沉通塞分定莫違兩榮霜悴誰能易之首丘志願老益  
不移越鳥擇巢忍離南枝此心同也將一語誰非我族  
類難吐肝脾貽書雖遠尚慰旅思今絕筆矣永無見期  
祭不躬奠哭不近惟江流有窮莫窮此悲嗚呼哀哉尚  
享

祭百一兄文

孫仲益

嗚呼吾兄之歿十有四年中罹多故共畏禍連避盜徂

遷靡有定所炎海之陬又以謫去生還萬里歸視殯宮  
久不克塋有愧在中荆溪之陽牛山之阻卜云其吉安  
以即路護外有棹簷中為堂既固既安萬世之藏嗚呼  
尚享

祭知命弟文

黃魯直

君歿荊州我在萬里歿後四月始聞訃音既無孤惻悻  
有兄弟天既喪我君不能年自我哭君頭髮盡白英風  
豪氣窘此一棺拊棺長號殆無生意公私之計身有所



縻既難以歸舟車可慮乃得吉卜旅殯僧坊雖遠至親  
理則安宴無驚無恐扶持上舉絕痛一觴君其尚享

祭前室吳氏墳文

孫仲益

恭惟伉儷之好實同貧賤之交天不假年死生契濶追  
慟九原之隔貪榮一紀之餘託備藩維追參法從爰舉  
終衣之典寔資內助之賢象軸錦橐光賁泉壤英魂如  
在歆此寵靈嗚呼哀哉尚享

祭章淑人文

孫仲益

嗚呼伉儷十年如屈伸項夜壑舟移逝無留騁中州鼎  
沸共此百罹又于其間有合有離垂老投荒一訣首路  
萬里計聞奄至大故藁塋空山來視定封但見宿草動  
搖春風逢時不祥抱恨入地何辜于神而至于此玉潭  
之原鬱鬱佳城陬龜視日我以檝迎湖波不揚若有神  
護抱覬呱呱兒啼孺慕嗚呼已矣閑此新宮敬酌一觴  
涕淚沾胸嗚呼哀哉尚享

祭亡妻大祥文

葛謙白

嗚呼伉儷之愛頓隔泉壤日月逝矣我及大祥徹几中  
堂遷神家廟聊陳薄奠式燕芳魂號呼不聞有淚如雨  
嗚呼哀哉

祭婦胡氏文

吳元及

惟靈挺蕙蘭之質于季膺之胄而執箕帚之奉于子雲  
素範之門鸞鳳聲巧桃李華芬克婦德之肅雍以和夫  
家而舅姑綽以孝聞具此數美是宜康寧壽考視靈椿  
以久存風魄雪魂忽先朝露故天道之寧論雖死生壽

天達人視之猶旦暮而藐爾諸孤惘然無依曷勝乎肅  
肅之夜月黯黯之愁雲某幸聯瓜葛久被仁恩聞訃何  
處抱恨無垠氣欲絕而復續聲已發而屢吞嗚呼哀哉  
蘆花雪舞菊蕾金噴況是人情最難死別那堪秋色偏  
易銷魂肉在俎兮酒在樽薦生葛兮淚沾巾尚享

母安康郡太君祭亡女陳氏十娘文

黃魯直

汝嫁十年五歲歸處姑嫜不呵知我憐汝我徂江南三

年搖搖元豐甲子汝兄還朝道淮沂洛望汝來寧不聞  
車音乃聞哭聲汝疾何藥汝斂何服臨絕之情不能我  
告哀憐至骨哭淚至泉我創如新于今七年乳母來歸  
婿亦繼室昔所抱兒亦既結髮惟汝面目永隔枯木鳴  
呼昊天忍此荼毒久于客土勤我夢思日月之吉寔寔  
有期我病在床不能奮飛寓奠千里文不及哀尚享

祭女二孺人文

孫仲益

維年月日謹以清酌庶羞致祭于亡女二娘之靈嗚呼

哀哉與汝為父子三十有一年不謂衰老棄我而先天  
乎我辜不畀爾壽一夕遇疾忽奄不救緊汝病革害于  
語言託夫與子半詞莫宣天降災殄莫逾汝酷人誰不  
死抱恨就木汝夫館我逮十年餘羹藜飯糗共其有無  
豈謂汝亡而有厚薄庶幾久要定此窮陋二雛呱呱誰  
撫誰憐如見汝面在吾目前歸女教男冀成汝志吾雖  
老矣猶有兄弟獨念汝夫強仕之秋誰復為汝瞻守一  
丘先墓之次卜此新宮祖禰相望我祭其從季冬之月

吉日庚午汝其顧歆以封其樹念汝永歸五內若焚拊之慟絕汝聞不聞嗚呼哀哉尚享

代壽昌縣君祭張通直文

汪彥章

嗚呼余來婉于君門逮舅姑之輔佐同張氏之艱難若塤簾之應和憫叔姒之二三及所天之遭禍保齒髮于桑榆蓋惟君而與我幸似續于兒曹各承基而不墮余竊邑于脂封君通班于禁鎖享甘脆于優游亦吾家之足賀憶靖國之初齡從子官于浙左承祖餞于行車起

相持于別坐謂聚散之尚常涕交頤而疾墮曾此會之  
幾時遽春風之五過聞霜露之憂居欲亟歸而不果喜  
藥石以護持起沉綿于九卧雖日昃以景西庶相從而  
尚可何卜見之有期忽訃音之來播恨嘖老之無窮氣  
傷孤而愈挫唯福壽之平生無秋毫之坎軻為天下之  
甲門孰人言之敢破天胡嗇于百年使不終于保荷退  
忍笑于總緯反惜成于香火嗟已矣于一觴終莫聞于  
咳唾嗚呼哀哉尚享



五百家播芳大全文粹卷九十九

欽定四庫全書

五百家播芳大全文粹卷一百

宋 魏齊賢

葉 棻同輯

祭文

外親

祭舅氏李公擇文

黃魯直

盛德之士神人所依珠玉在淵國有光輝方時才難公

隕于道彼天悠遠莫我控告士喪畏友朝失寶臣我哭  
之慟不惟懿親公處貧賤如處休顯溫溫不試任重道  
遠內行純明不缺不疵臨民孝慈來歌去思其在朝廷  
如圭如璧忠于謀國不沽小直熙寧元祐言有剛柔公  
心如一成于好謀十年江湖睟然生色三年主計鬚髮  
盡白他日謂我何喪何得我知公心謀道憂國出牧南  
陽往撫益部稱則辨嚴笑語即路天下期公來相本朝  
奄成大夜終不復朝嗚呼哀哉我少不天殆後堙替長

我教我寔惟舅氏四海之內朋友比肩舅甥相知卒無  
間然今天喪我舅氏傾覆誰明我心以血繼哭平生經  
過為我舉觴沃酒棺前割我肺腸嗚呼哀哉尚享

祭外舅吳寺丞文

葛謙白

嗚呼宣和山陽公始女女不余陋庸甥館見處浹旬別  
公侍親臨安有燼其旆公來自楚欲視其息不憚羈旅  
公官蓬池我舟繫渚公為歡迎倒屣延竚濶展杯盤侑  
此歌舞龍集甲辰注官銓部十口累公遂閱寒暑出乘

公車入蔭公宇寧勤館人喜持揮塵虜動維揚歲在丙  
午變起倉卒公渡江浦僑居吾邦始獲安堵草舍茅茨  
連牆接武履艱蹈危更相勞苦忽起越吟莫皆久聚甲  
寅外姑玉樹埋土我攜弱妻一慟塋所辱公淹留曲加  
拊偃前年菰城犀顏再覩勤公放船來訪郊野時病耳  
聰中響翅羽意謂仁人何恙弗愈遽違我行咽不得語  
莆陽之官冒涉修阻歸未黔突丹旄歟舉嗚呼哀哉惟  
公早齡天授才諳入丞府寺出貳藩府所臨有聞德洋

思普矧惟平生陰德莫數天災告饑輒發我庾為梁千  
丈不靳囊褚謂當大奎袞職是補如何弗淑遽沉幽戶  
嗚呼哀哉我婿高門歲二十五訃音忽來痛貫心膂道  
里數千神棺莫撫遣介伸哀殞涕如雨有酒在觴有肴  
在俎歆此微誠公其勿吐尚饗

祭外姑蔡宜人文

葛謙白

嗚呼獲婿高門一紀有奇始聯好于山陽繼歎睇于蓬  
池同居禮闕連屋荆溪雖所履者有枯有苑而所遭者

有險有夷拊偃矜憐之意則一蓋未嘗不曲盡其慈也  
去歲夫人卧疴適亦呼醫悵侍疾之莫及遂永師于音  
徽洎聞凶訃攜孥亟歸冒修途之蒸鬱經川陸之艱危  
踵門長號第見縞帷嗚呼哀哉今日遠日告吉墨食令  
龜屬茲匏繫又不得臨壙而伸其悲酒脯之奠遣介致  
之東望腸絕頤涕交揮嗚呼哀哉尚享

祭外姑何恭人文

張敬夫

惟靈生于相家來嬪德門奉饋采藻克謹晨昏如賓之

敬婦道則宜逮夫晚歲有光母儀允矣三德協于彤史  
胡不百年永庇孫子憶在柔兆獲拜于堂辰幾一周有  
淚淋浪我悲終天靡所怙恃起尋渭陽痛復祇此傷哉  
道遠一慟莫前薄禮將誠靈其鑒然尚享

祭親家文

惟靈之生婦德著兮柔淑且慧妄怨惡兮賢哉主饋克  
內助兮敬長恤孤宗姻譽兮既肥其家而錫祚兮振振  
繩繩繁而庶兮宜耆而艾何朝露兮彼蒼者天而太苦



兮胡其不仁奪之遽兮如晝而夜抑定數兮伊令仲子  
予女女兮粵與外孫而許娶兮再世婚姻嗟莫顧兮追  
懷感傷曷云喻兮載以清醑肴饌具兮伊禮之薄盡其  
慄兮嗚呼靈兮莫予吐兮

祭朱時發親家文

陳了翁

嗚呼昔會靜海于今六年君護喪歸我以竄遷迨隔三  
江懼無還日天子仁聖復令我歸離台之時未得君訃  
單舸北來猶冀復晤白沙之傳初信且疑今知果矣孰

知我悲君老苦學趨一而專富而能貧內無間言寂莫  
能仁為方外師志者于仁孰得而疵仁則宜壽胡不期  
耄天所促延人奚可考君于世味澹乎其歸苦樂壽夭  
存歿豈移淮江阻修奠不以時情發于詞君其鑒之嗚  
呼尚享

祭姊夫李提舉文

陳了翁

嗚呼昔我先君愛鍾令女擇所宜從以歸于子子昔悼  
亡我方居憂痛在手足涕不能收季妹繼適今能幾時

子既殞矣孰知我悲我非明哲觸禍固宜子亦放廢一  
斥不歸窮達死生所遭各異海波之水東逝而已數極  
而化亦又奚傷君子之道死也不亡嗚呼尚享

祭包氏妹出殯文

孫仲益

嗚呼哀哉某政和初與吳氏妹侍先妣太淑人將吾妹歸  
于同縣之包氏大家勝衣冠者數十百指而夫君哀然  
獨秀蔚為宗廟瑚璉之器後四十年而吳氏病歿于京  
師又四年太淑人感疾而逝中更喪亂死生契濶而包

氏尊章亦已下世獨吾妹克相其夫兮男冠女婚持門  
戶之寄謂當壽考百年與君子偕老兮云胡不病而遽  
蛻嗚呼哀哉追數存歿兮閱一瞬而三紀嗟兮歸然獨  
存兮隻影隨而卧起始結褵而踐其行兮又窳莫而送  
之死鬱萬感以中集兮溢兩背其洗如手足情所鍾兮  
此身歿而後已魂揚紼以來歸兮歆余豆觴之薄祭嗚  
呼哀哉伏惟尚享

祭妹夫祝天惠文

趙承之

昔我叔父少失其配壘然二女誰怙誰恃先君鞠之蓋  
猶出已伯長且賢以配君子好學發憤方少而剛在窮  
不恤屢舉于鄉而輒不偶布衣儒冠以至白首後生紛  
紛或登而先昔也納履公而自賢先生皤然志節彌厲  
奔走四方以至于死嗚呼哀哉某兄弟幼孤且愚先生  
教之讀以詩書獲游薦紳則維公賜我圖報之而乃如  
此嗚呼哀哉相公平生舉白呼盧憶公疇昔慷慨捋鬚  
涕泣陳觴叙訣梓里猶有諸孤敢不終始嗚呼哀哉尚

享

祭李甥文

陳了翁

吾與乃翁俱為竄人我來萬里與鬼為鄰瘡毒之鄉朝  
不保夕謂必與汝平生永隔吾衰既久汝方妙年孰謂  
汝也而棄我先唯吾二家世接姻眷汝母及汝吾妹吾  
倩我取熊堂天寶使之迺翁南遷亦豈人為仲取高第  
既得而奪汝性孝友知汝惛惛左右就養不營其私隨  
泊湖外五年于茲不得汝書今兩歲矣形阻心親不隔

萬里信自北來吾心蛩然云胡不淑乃以訃傳我初論  
事既捐其生杜門待盡符到奉行家如風舸任其浮沉  
勢不能保豈無愛心死者歸也汝既歸矣吾雖未歸俟  
命而已汝生不幸汝死不亡千載之後聞者嘆傷嗚呼  
哀哉尚享

朋舊

祭張季清文

呂伯恭

嗚呼游于師友之間斂然自持豈無其人舍業而歸耳

目改前移養鑠奪而不失其初心者益亦寡矣子之在吾門也侃侃和飭執經不忘于是時猶未知其為獨異也自我不見于今五年有來自西者皆道子于兄弟無違言于閭里無遺行安常謹禮不受變于俗吾方喜于得子逮此暇日將過子之廬而子則死矣嗚呼庠序之籍日增而務實之士不加益一觴之慟豈獨為故舊之情而已哉尚享

祭邪邪傑文



越絕之區學者方興一門孝友舊推諸邦内外交映韡韡嚶嚶人之可願于此而并猗左提右挈紛前導而後承實霜電于春陽久此樂而莫能喟予感于傷弓駭弦音于鵲鵲陶近憂其未慙集遐感而相仍理鏡湖之桂楫踐前諾于歲更訪舊聞于故老采新益于友朋愴獨逢于仲氏同此哀于折肱嗚呼尚享

祭于悅道文

嗚呼自子束書從予遊于明招八年于茲矣每見每進

筆端津津如春木之向榮意其前途蓋未艾也我來自  
山而子死問至折屐失聲猶幸風傳之或誤也疇昔之  
夜子語我身名未立予故疑其色不舒亦以為是適然  
耳庸詎知一再旬之後乃大出于所憂之外耶流光悠  
悠兩川東下命也奈何付此杯酒嗚呼哀哉尚享

祭潘子皋文

名場利區爵標執的稚奔耄馳百年一日仁宅義路道  
源性淵有能用力一日百年之子之才之識之操萬里

首途遽以病告意長數短獲歎殖豐寸心惘然恃此以終有親未報有弟未立有養未克有志未畢合是數者屬之吾徒矢口而言言發不渝里門相望伯仲叔季責以撫存亦孔之易道學之責喬岳高丘毋或不勝重遺子羞嗚呼哀哉尚享

祭陳耀卿文

嗚呼菁菁藝圃羣植並區夭壽豐悴一本萬殊以子之年方苞方畹岷山導江適觀厥初病不復興歎驚吾徒

游從之義具此俎壺

祭吳晦叔文

張敬夫

嗚呼惟君早登五峯之門即捐進取之習從事于義理  
今幾二十年思慮益親操履益固而其曉悉人情通練  
世事持之以忠信行之以周密蓋有用之實才而進學  
之良資也豈謂一旦止于斯耶某與君論心為日亦久  
切磋講究友誼金石訃音來傳泣下莫止嗟呼任道之  
艱而同志益落此予之所悲且憂也官守所拘未能往

哭一奠遣致言不復文嗚呼哀哉尚享

祭李先生文

朱晦翁

道喪千載兩程勃興有的其緒龜山是承龜山之南道  
則與俱有覺其徒望門以趨惟時豫章傳得其宗一簞  
一瓢凜然高風倚歟先生早自得師身世兩忘唯道是  
資情義造約窮極幽微凍解冰釋發于天機乾端坤倪  
鬼秘神彰風霆之變日月之光爰暨山川草木昆蟲人  
倫之正王道之中一以貫之其外無餘縷析毫差其分

則殊體用混員隱顯昭融萬變並酬浮雲太空仁孝友  
弟灑落誠明清通和樂展也大成婆娑丘林世莫我知  
優哉游哉卒歲以嬉逮其季年德威道尊有來樞衣發  
其蔽昏侯伯聞風擁琴以迎大本大經是度是程稅駕  
云初講議有端疾病乘之醫窮技殫嗚呼先生而止于  
斯命之不融誰實尸之合散屈伸消息滿虛廓然大公  
與化為徒古今一息曷計短長物我一身孰為窮通嗟  
唯聖學不絕如綫先生得之既厚以全進未獲施退未

及傳殉身以沒孰云非天某也小生卅角超拜共惟先  
生實其源派閭閻侃侃歛衽推先冰壺秋月謂公則然  
施及後人敢渝斯志從游十年誘掖諄至春山朝榮秋  
堂夜空即事即理無幽不窮相思日深見勵彌切蹇步  
方休鞭繩已掣安車暑行過我衡門返旆相遭涼秋已  
分某于此時適有命名問所宜言反覆教詔最後有言  
吾子勉之凡茲衆理子所自知奉以周旋幸不失墜歸  
裝朝嚴訃音夕至失聲長號淚落懸泉何意斯言而訣

終天病不舉扶歿不飯舍奔赴後人死有餘憾儀刑求  
隔卒業無期墜緒茫茫孰知我悲伏哭柩前奉奠以贄  
不忘者存鑒此誠意

祭王深甫文

王介甫

嗟嗟深甫真棄我而先乎孰謂深甫之壯以死而吾可  
以長年乎雖吾昔日執子之手歸言子之所為實受命  
于吾母曰如此人乃與為友吾母知子過于予初終子  
成德多吾不如嗚呼天乎既喪吾母又奪吾友雖不即



死吾何能久搏胸一慟心推志休泣涕為文以薦食酒  
嗟嗟深甫乎尚知否

祭李元叔文

黃魯直

嗚呼元叔之義世不可少赴人急難秋陽皦皦奉親色  
難慈友諸少家人潔齊門巷洒掃築室聚書延聘師表  
青青子佩如魚游沼凡厥富室乾沒紛擾君常晏然萬  
鍾忽杪壽母令妻升堂宴笑慈以旨甘歌舞姝妙里人  
欣欣皆謂之好攝提季夏舍有鵬鳥屏藥治歸竟夜無

曉邑人奔走上下是禱人亦有言蓋棺事了生榮死哀  
誰謂君天我遷黔戎形影相吊衣我食我歲使交道立  
楚望楚山復江繞屬辭羞奠氣結天杪平生不昧尚享  
馨醪嗚呼哀哉

祭劉凝之文

嗚呼公乎知謀足以御困剛毅足以行可獨清足以軌  
物自勝足以立我兀者造而歸全諒無地以棲禍方燕  
及于來仍閱門戶之嗟我忽厭俗而去仙違白日而蛻

卧亡吾黨之一鑒哀楚望之傾彫伊曩時之倦游實翫  
磴而坎軻遂投効于潁尾置嬪息于寒餓來胥疏于江  
湖訖有屋于春簞孰盈虛以化物取衆棄而致影間江  
曠之有秋上摘柚之歲課開亭觀之百楹葦綠竹之萬  
箇衷餘力之不試故優裕于菑播據几杖以徜徉樂知  
識之來過味龐公之幽禪觀有物于石火歲三會于泥  
灘訖初志其不挫維歐陽之文章發高唱而無和配公  
名而成三何巧舌之能破齒髮疎而戀嫪坐衰氣而不

果載銘旌而來歸遺稚子以危貨彼聞公之清風亦何  
面以承唾初不肖之及門輩諸孫之孩孺公慈祥而豈  
弟獲聞教而侍坐歆歲晚而升堂見虞主而淚墮湛樽  
酒其儻嘗列羣悲于楚些嗚呼尚享

祭李彥深文

黃魯直

嗚呼彥深華路泥塗賢于駟馬之駕席門風雨安於數  
仞之堂體狐貉之溫而不恥緼袍壞絮知膏粱之味而  
不厭脫粟寒漿終一世而扼窮內不疚其何傷維相知

之不早始傾蓋于汝陽披蓁叢之鎖碎見紫蘭之孤芳  
沉深而敏學易簡而庭方鄰非仁而不覲粟非義而不  
嘗遇人情之難堪既催折而愈剛號饑寒之滿屋仰歸  
鴻之南翔擁羣書而寤歎擅榮觀于文章論若人之豈  
弟謂百歲而康強忽靜寤而不覺問歸來兮未央去親  
戚兮朋友即萬鬼而為鄉嗚呼虞氏之不為政久矣士  
不厭于糟糠載固窮以軌世魯人至今傳其惠康身與  
螻蟻共盡名與日月爭光我觀古而視今信吾友之不

亡所以發書而掩淚不忍痴孤與早孀婦弱女而教男  
定子宅于南山之岡有謝公之知子固特達于珪璋在  
吾儕之可力尚始終而就將哀哉月之徂秋悲風號于  
土囊託千里而羞奠肴具潔而酒香思曩時之笑語同  
飲食之淋浪列檮蒲之花燭呼五白而繞床倘神聖之  
不昧以斯文而舉觴嗚呼哀哉尚享

祭鄧鯁之文

陳了翁

嗚呼鯁之冥冥鴻也簞瓢自足藐鼎鍾也宜止則止良

其窮也有物有常家雍雍也彼臧彼否默而容也孰喜  
孰怒寂乎中也盥而不薦志在顓也射已之鵠審其固  
也棄彼所爭不與同也包攝無間介而通也其積彌高  
不自穹也其割彌利飽磨礪也志道則士耕則農也齋  
戒其年願普豐也洛口之別再星終也我禦魑魅不吾  
攻也衆侮而逝來益恭也孰不信彼獨由衷也火勢炎  
烈堅不容也派流分漫趨必東也詩來了齋手自封也  
馨積吾筍氣蘭芬也讀而味之餒可充也歲寒不易挺

挺松也還里胥樂願未從也故不少延棄我終也隱几  
坐逝沒不窮也不器其有獲豈登也俗睭迺跡憫不逢  
也卒以歲計孰幘幘也人生流寓猶波蓬也谷無停響  
隨彼閑也衆耳瞢瞢聽獨聰也問兮聞乎示以聲也生  
死不貳歸其宮也儒耶佛耶一視融也嗚呼尚享

祭梅卿叔文

黃泰之

惟靈慷慨正直得于天資莊靜夷雅賣出流輩種學積  
文優游乎聖賢之域砥節礪行周旋乎規矩之內奉親



長著孝友之風飭子弟有義方之誨繫厥德之純備宜  
享齡之未艾胡六旬而甫及乃一疾而遽蛻莫能語造  
化于小兒殆將任勞逸于大塊某等怡愉骨肉繾綣愛  
情茶甌酒盞日聚時會感佳節之過眼悵音容之何在  
慘黃花而無色對西風而一酌嗟物是以人非覺肝裂  
而腸碎飲此恨于終天想英靈之不昧嗚呼尚享

祭徐宗卿文

呂伯恭

嗚呼子于輩流號為端靖見我于嚴厥問日振加之數

年道戰將勝何辜于天乃中絕命遣此一厄千載之臚  
尚享

祭詹子齊文

嗚呼入事父兄出事公卿視之至近居然高深昔在講  
席聽者如林子于是時奉持兢兢既踐子職亦祇官箴  
地中生木順德日升天則奪之疾疫相乘涉春夏秋泯  
不呻吟胡不呻吟恐憂其親惜哉此士哀哉此心風雨  
寒窓餽奠之情嗚呼尚享

祭蔣從道文

嗚呼弁服之襜然弦歌之鏘然子游其間兮呻吟挾策而纍然賈區之囂然怪珍之錯然子廬其間兮講誦下帷而塔然貌甚癯兮志則堅力既憊矣道方遘出門軸折兮淪晝景于虞淵大塊噫兮化機旋森回薄兮紛糾纏天壽不貳兮又奚怨倚朋游兮昔蟬聯交一臂兮失九泉跼傳觴兮江之壖暮山合兮橫蒼煙嗚呼哀哉尚享



五百家播芳大全文粹卷一百